



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 10

Modi sorkari election nung tamakok angutsü tsübur

AB de Villiers cricket asaya nungi anener



VOL. XIX NO. 43 (ADOK 43) DIMAPUR KÜPTOKNÜ (SATURDAY) YIMPOKSÜI (NOVEMBER) 20, 2021 ₹ 5.00

PM Modi-i Farm Laws 3 meyipa agiba osang metetdaksü

New Delhi, November 19, 2021 (Agencies): Centre-i ashishitep aketba Farm Laws asem meyipa agir anungji lungkak aitba aluyimertem kidangi aotsü mepishir, ta Prime Minister Narendra Modi-i Hokolbarnü metetdaksü.

Delhi aser linük kübok tesem ajungalen aluyimertemi Farm laws asem anema lungkak aityonga arur joko kum ka ajunger.

"Centre, agri experts aser aluyimertem adenba luden ka sorkari shimogo aser parnoki aluyimertem ajangzüksü asoshi lenmang bushiteptsü" ta PM Modi-i ashi.

"Ni mapa tajung maneni inyaksü. Ni inyaksüba linük atema lir aser kechi inyakdir linük atema dang asütsü. Nenok pungmangtem asangsang akümsüsa ni talila inyaksü" ta pai metetdaksü.

"Ni kum 50 jungnüa nübor asoshi inyaka arudang aluyimertemi tayongzükba ajurubatem nguogo. Iba jagi kü nem 2014 nug Prime Minister inyaksü maongka agütsüdag agriculture development aser farmer welfare nung temolung agütsü" ta Modi-i ashi.

"Tanü ni nenok dang aser linük ajunga dang onoki agricultural laws asemprong meyipa agütsü telemteba agiba osang metetdaksür. Tan ita agütsü aliba Parliament session nung onoki ozüngi melaba ama agricultural

laws asemprong meyipa agütsü" ta paisa metetdaksü.

"Linük nung zero budgeting based agriculture ajangketsü aser minimum support price (MSP) maparen tajungba akümsü atema luden ka tentetsü. Iba luden nung centre, state sorkartem, aluyimertem, agricultural scientists aser agricultural economists nungi teshimtet nübotem adentsü" ta Prime Minister-isa metetdaksü.

"Parliament nung ozüng asem meyipa magi tashi onoki lungkak aittsü" ta Bharatiya Kisan Union (BKU) tanishir Rakesh Tikait-i Hokolbarnü ashi.

"Sorkari aluyimertem den minimum support price (MSP) aser tanga onüktem atema jembitsüla" ta Rakesh Tikait-isa ashi.

"Democracy inyakyim nung lungkak aitba ajanga mekoktetbaji elections agütsü atema aliba tsüba bilemba ajanga koktetet" ta Congress lennir aser taoba Union finance minister P. Chidambaram-ia metetdaksü.

"PM Modi-i farm laws asem meyipa agiba ya policy melenshiba mesüra tangatetba melenshiba ajanga masü saka elections tsüba ajanga agiba lir" ta pai ashi.

Punjab Congress president Navjot Singh Sidhu-ia aluyimertemi lungkak aitba ajanga takok tulu nguogo ta metetdaksü.

NPF CYW Leadership Meet tembangogo



November 19, 2021 nü State Academy Hall nung NPF MLA tem aser MP temi NPF youth wing ketdangpurtem den külemi agiba noksa angur.

Kohima, November 19, 2021

(TYO): "Asen tsüraburtemi Naga yimten asoshi azü tokshibaji tanga telemteba kecha atema masü saka yimten nüchiso asoshi tenla agütsüba liasü, anungji tanüa yimten nüchiso jenjang ka mesüra, tanga telemteba bener arubajibo khen atema dang asütsü," ta tanü MLA Wb.Kuzholuzo Nienu-i yangi State Academy Hall nung NPF lanurtem senden sentong ka nung jembidang metetdaksü.

"Naga nungeri kechiba yimjung mali ta pei sasa bushidangtsüla aser asenok longjem nung dang yimjung angutsü. Naga nunger longjema maliba ajanga yimjung mali aser pei atema dang bilemba aser 'ism' tangatetba agientsüla. Naga nunger ajak ajungtsü atema kin telemsa malitsüla" ta pai metetdaksü.

"Kechisarena atema mapang ka lir aser NPF-i kum 15 tashi anogo tajungtem ajurua sorkar yimsü süogo. Ano opposition nung alidanga party-i shilem tajung agiogo. Opposition nung aliba ya lenisüba tendangba mapang ka lir aser aikatibo magizükteter saka tashi ita alirtemi dang tizükteta tejakleni aoe" ta MLA Kuzholuzo Nienu-isa ashi.

"Lanur tanishirtemi pei dak amangtsüla aser kechi atalokdir

ibaji tajung atema dang ataloker ta angatetsüla. Tsüngremi dang asen tarutsü yanglutsür aser ibaji asenoki agizüksüla" ta paisa ayongzük.

"Naga linük nung mepetmesü agi sünger aru aser 1997 kum Naga yimten teloktem aser India sorkar tsüngda Ceasefire nung sign sütep. Lennirtemi yimjung atema molungtepa linük tasen ka yangertsü jembitepa arur kum 25 süiogo" ta Outer Manipur Parliamentary Constituency nungi Member of Parliament (Lok Sabha) Dr Lorho S Pfoze-ia ashi.

"Tanishirtemi Naga nungeri inyakba mapatem shisadangtsüla aser tamang mesamatsüla. Tsüngremi asenok kija shia aser Naga nunger atema nükjidong ka lir anungji lanurtemi yimjung bener arurtem asütsü ayongzük" ta Dr Lorho-isa metetdaksü.

Manipur nung NPF party-i shilem agiba indang olen kar jembidang bandhs ajema kumogo aser Manipur nung tanü yimjung lir, ta ashi.

"An tebongi anepdang züngia akonger aser iba yagi amang süiba aser anogo tasen ka ajuruba sayur. Anungji NPF-i teimla, tayongzükba, mapa aser mera tasentem bener aruba temelenshirtem asütsü merangtsüla" ta paisa ashi.

"Mepetmesü aser tera agi sünger aliba loktiliba ka nung lanurtemi telemteba tajung ka bener arutetsü aser asenoki tang nüngdabaji yimjung lir" ta Nagaland MLA Dr Chumben Murry-ia ashi.

Anogo ana NPF Youth Wing mungdang amongdang Party President, Dr. Shurhozelie Liezietsu aser NPF Legislature Party Leader, T. R. Zeliang lenisüba pusema nungiter ta bangzüngtep.

NPF Youth Wing-isa Indo-Naga yimjung maparen nung yariteptsü atema opposition maliba United Democratic Alliance (UDA) sorkar kumtetba atema tenüngsang agütsü aser pelaba metetdaksü.

NPF Youth Wing-isa Naga National Political Groups ajak dang obang meputep aliba onüktem angatetteptsü aser tekaratiba nung Indo-Naga Political olemtep tembangtsü atema longjemtsü ayongzükogo.

NPF ya Naga loktiliba nung tera yanga lir aser 2022 Manipur State General Election aser 2023 Nagaland State General Election atema party tashi aittsü aser takok angutsü atema inyaksü, ta NPF Youth Wing-isa bangzüngtepegogo.

Parnokisa NPF office indang kümsük ka nung 'Youth Wing Leaders Meet' khenbosa ayonga agütsü telemteba agi.

NSCN-R nungi telok tasen ka razüka ogo



NSCN-R spokesperson Nokrang Lanu Aier aser MIP Kilonser AV Chophi nati Hokolbarnü Hoito yim nungi osangbener den jembidang agiba noksa angur. (Dimapur, November 19)

Dimapur, November 19, 2021

(TYO): NSCN-Reformation nung Vice president, Akato Chophi-i anir telok tasen ka razüka ogo aser parnoki tatemzükba kecha makai India sorkar den ceasefire alitsü metetdaksüogo.

"Tang tensa nung telok tasen ka razüka aotsü ya tim masü, saka Naga nunger ajangtsü mechi aser Naga nunger yimten temeden maneni wazüka ayutsü mechi nung onok razüka aoe" ta spokesperson Nokrang Lanu Aier-ia ashi.

Ibai razüka aoba dang lir aser onoki NSCN-R indang züngsem kata manentsür, ta paisa ashi.

Iba telok nung Akato Chophi-i tir inyaksü.

Tawa tu NSCN-R telok nung telemsa adoktsü akok ta osang kar prokshia liasü.

Ajisüaka WC, NNPGs convener N. Kitovi Zhimomi aser NNPGs nungi lennirtem tetsüngdai ia mangatetep alibatem timi angatetepa liasü aser Naga nungeri aginüba ama aser yimtenren ken o tangatetep kati arutsü mechi songtema liasü.

COVID-19 Nagaland: 8 dak putet & 12 taneptsü angu

Kohima, November 19, 2021
(TYO): Nagaland nung Hokolbarnü nisung 8 dak COVID-19 putet aser 12 taneptsü angu.

"Tanü nisung 8 dak COVID-19 putet. Parnokji Dimapur nung nisung 6 aser Kohima o Mokokchung nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-ia ashi.

"Taoba ghonda 24 tsüngda COVID-19 puteta alir nisung 12 tashi taneptsü angu. Parnokji

Dimapur nung 7, Kohima nung 3 aser Tuensang nung 2 lir" ta paisa ashi.

Nisung 32,040 rongnungi 30,165 tashi taneptsü nguogo aser ibaji taneptsü angur 94.16% lir, ta Dr Kikon-isa ashi.

Tang nisung 127 anepaludar saka parnok 104 dakbo shirangba yimya kecha mali ta paisa metetdaksü.

"Brihostibar tashi nung nisung 722,393 nem COVID-19 vaccine indang dose 12,50,399 agütsüogo" ta State

Immunization Officer, Dr Ritu Thurr-ia ashi.

"Vaccine agirtemji frontline workers 60,976, healthcare workers 15,999, arishi kum 45 ser temapur 204,761 aser arishi kum 18 nungi 44 tsüngda alir 440,657 lir" ta paisa shisem.

"Tang tashi nung nisung 528,006-i dose anaprong agiogo. Parnokji frontline workers 48,261, healthcare workers 13,469, arishi kum 45 ser temapur 168,344 aser arishi kum 18 nungi 44 tsüngda alir 297,932 lir" ta Dr Thurr-isa ashi.

Kohima nung CSTK Hon Jubilee among



Dimapur, Nov. 19, 2021 (TYO) : Changtongya Senso Telongjem Kohima Hon Jubilee Mung November 19, 2021 anogo munga liasü. Iba anogo Tetushi Tejaoker, Wb. Imnatiba, Advisor, Industries and Commerce, Labour and Employment, Skill Development and Entrepreneurship ajanga yamai ashi, "Tsüngremi meimba aser ajiokba nisungjibo mela mela magiener. Anungji Aor nisung shia pei taküm tali shia lira Pa memoatsüi malitsü. Aori Tsüngrem teyongtsü südaktsür tasü ita alima ani nungbo alimai asenok sülen anidaktsü. Yamaji mesütetra tebenjaba taliang adoktsü. Aorji tangari meinyaknuba inyakba kin, tangari monüba limai onüba kin, tangari meinyaktetba mapa inyakteta sayuba kin. Pei nem temoatsü

agütsü dangbo asen mulung ajak agi Tsüngrem tenüng asanger saka kodang kidanger ka kasa temoatsüji angu nung asenoki tenük meremer. Tenük merem ya asenok dak nungi agientsüla. Asenok kati ka tenük meremba agi temeim mekongka akümer. Anungji senso kati ka meimtsü asoshi asen takümü Tsüngremi aniba taküm kaka südaktsüsüla". Tongti O jembir Dr. Tainla Mari onük Mesensenba Mitsa omen nung ajemdaker jembidang ashiba agi küm 50 yabo süngjang jitetba mapang ka, oda tenükshitsü mapang aser tarendaktsü makaba mapang ka lir. Yimtsüng nung nokinketer lira parnoki yimer tsükchir ket nungi kümzüka yutetba ama tanü nüburi temulung lemtettsüsa nubu tajung alimai nüngdaker. Rongsenketsüng, shisaliok aser

political tsütsü nübür mesenseni anitsü asoshi asen Aor rongnung nubu tajung alitsüla. Telongjem, temeim, ajemalu aser pei sasa azüoktetba taküm kaka südi ta sentepa alirtem ayongzüik. Iba sentong nung Jubilee nüksang sarasadem Rev. A. Chuba Jamir, Pastor, KABA; Tayongzüikba Wb. T. N. Jamir IFS (Rtd.) ajanga agi aser Tepela O jembirtemji Kohima Aor Telongjem, Langpangkong Senso Telongjem Kohima, Changtongya Village Council aser S. P. Fransis, Managing Director, Model Higher Secondary School Kohima liasü. Temeja ken ka Changtongya Kaketshir Telongjemi aten, Jubilee Bangzüng T. Mar Longkumer Executive Convenor, CSTK aser melepzüng o I. Noksang, Convenor, Hon Jubilee Planning Committee ajanga agi.

Advisor H. Haiying-i Longleng nung District Jail semzüksü



November 18, 2021 nü Longleng District Jail semzüksü mapang tangokba noksa ka nung Advisor, Prisons and Printing & Stationary, H. Haiying; Minister, Health & Family Welfare, S. Pangnyu Phom; Advisor, DUDA, N. Bongkho Konyak aser MLA, S. Keoshu Yimchunger nungertem den ketdangsürtem angur.

Dimapur, Yimpoksüi/Nov. 19 (TYO): Advisor, Prisons and Printing & Stationary, H. Haiying ajanga November 18, 2021 nü District Jail, Longleng semzüksü liasü. Iba sentong nung Minister, Health & Family Welfare, S. Pangnyu Phom; Advisor, DUDA, N. Bongkho Konyak aser MLA, S. Keoshu Yimchunger nungertema dena liasü. Executive Engineer (CAWD) Kohima, Er. Sungtiba Amer ajanga iba jail yangluba indang osang agütsü. Advisor Prisons, Printing & Stationary, H. Haiying-i iba sentong nung jembiba mapang, state nung district jail ter aser central jail ka lir, aser Longleng District Jail bendenlokba ajanga Nagaland nung jail ter-ser ana alitsü, ta ashi. Iba maparen inyakba mapang timtem jenti ajurua liasü

saka takok ngua renemogo, anungji contractor, engineer aser iba jail yangluba nung shilem agir ajunga nem tenüksang agütsür, ta pai ashi. District Jail tasen ka amenoker asünungji, tang nungi tenzüka teyari atema danga district dak metaloker malitsü aser ajak atema anisüngzüik asütsü, ta Haiying-i ashi. Pai iba sentong nung adener ajunga dang, district nung iba ama ki-o-jen aliba ajanga nübürtemi lenmang shidak nung jajatsü, ta ashi. Tanü tendak tangatetba nung jembira, jail ya metongshitsüba services ka amai lir, ta pai ashi. Asenoki bilema kazüba kisüng masü saka nendaka aser temolung agüja mapa inyaktsüla, anungjidang tejakleni aotsü, ta Advisor-i ashi.

Paisa nübürtem dang amalitep akatsü ajungshi, anungjidang district jail ya tarutsü nunga state nung model jail ka ama züngshitsü, ta ashi. District Jail aliba ajanga mapa tamajung inyakba, temesepba mozü achi-ajemba aser auyaba tebilemstü samatsü imlar, ta iba sentong nung Minister, Health & Family Welfare Minister, S. Pangnyu Phom-i ashi. Pai District Administration, NGOs aser nübürtem dang kati ka den amalitep akatsü aser iba ama ki-o-jen tajungtiba nung amshitsü ayongzüka liasü. Paisa iba sentong nung adener dang COVID-19 anema mozü agitsü ajungshi aser tang tashinung iba tashidak nungi kumzüksü atema tajungtibaji mozü agitsüba ya lir, anungji ajak tekeratiba nung mozü ya agitsüla, ta ajungshia liasü. Iba sentong nung Advisor, DUDA, Bongkhao Konyak; MLA S. Keoshu Yimchunger; ADC Longleng; Bhumnyu Village Council Chairman aser tir, Phom People Council nungertemia jembia liasü. Iba sentong nung SRO (Plg) Prison HQs, Kohima, C. Lwngnyei Konyak menden liasü aser Senior Superintendent of Jails Prisons HQs, Kohima, Khushito Awomi ajanga melepzüng o jembia. Maneni Pastor, Oushok Baptist Church, Rev. Chingkon ajanga iba jail meshiteta sarasademja liasü.

Hornbill Festival nung 'SDG One Stop Destination' ayonger

Dimapur, Yimpoksüi/Nov. 19 (TYO): SDG Coordination Centre (SDGCC), Planning & Coordination Department ajanga December 1 nü Hornbill Festival mapang 'SDG One Stop Destination' ka ayongzüksü. Iba sentong kübok Sustainable Development Goals (SDGs) den putepa quiz, games, drawing competition, short film screening, SDG photo booth, SDG pledge amala sentong balala ayongzüka agitsü. Iba den bendenloksema 'Green Christmas Corner' ka amenoktsü, kong eco-friendly aser sustainable yimya nung Christmas amungtsü atema tangazükba agütsütsü aser local tem ajungshitsü asoshi inyakyim

balala benoka inyaksangshitsü. Inyakyim ajak indang omenji SDGs dak ajemkdaker asütsü. Iba sentong dak sendakba nung osang tejangja agitsü atema @sdgcnagaland semdangtsü ketdangsurtemi metetdaksüogo. Nagaland sorkari 2019 küm nungi tenzüka SDGs mesera Global Goals ya ajak atema aser localize südaktsütsü inyaka arudar. Iba sentong ya SDGs-oriented action dak sendakba nung nübürtem nem tangazükba agütsütsü aser nübürtem nem shilem agidaktsütsü atema aser benjung mapang inyakyimtem ajak SDGs den sendaktepdaktsütsü merangba sentong ka lir.

RCS Udan Scheme kübok Guwahati-Shillong-Dimapur tayimtsü senzütsü

Dimapur, Yimpoksüi/Nov. 19 (TYO): Alliance Air ajanga November 22, 2021 nü nungi tenzüka Guwahati nungi Shillong aser Dimapur tashi arutsü aser ano meyiper aoba tayimtsü ka senzütsü, ta sangdonga liasü. Iba tayimtsü (Guwahati-Shillong-Dimapur & meyipba) ya Government of India RCS Udan Scheme kübok alitsü. Airlines ajanga item yimti asem sendakteptsü atema 70 seater luxurious aircraft agütsütsü. Tayimtsü ya hopta nung pezünü (Hombor, Bodhbar, Hokulbar aser Honibar) senzütsü. Flight 9I 735 ya Guwahati nungi anüngdang 12:20 nung apusotsü aser anüngdang 1:05 ako nung Shillong atongtsü. Iba sülen Flight 9I 735 ya Shillong nungi anüngsang 1:30 ako nung ayamesotsü aser nikongdang 2:20 nung Dimapur tonga arutsü. Flight 9I 736 ya Dimapur nungi nikongdang 2:50 ako nung ayamesotsü aser nikongdang 3:40 nung Shillong atongtsü. Flight 9I 736 ya Shillong nungi nikongdang 4:05 ako nung ayamesotsü aser nikongdang

5:10 ako nung Guwahati atongtsü. Mezüng anogo nung Guwahati-Shillong indang Inaugural fare ya sen 1,786 nungi tenzüka alitsü, Shillong-Dimapur ya sen 1,887 nungi tenzüksü, Dimapur-Shillong ya sen 2,302 nungi tenzüksü aser Shillong-Guwahati ya sen 1,786 nungi tenzüksü. North East nung item yimitem tayimtsü agi sendakteptsü ya mapang talangka nungi nübürtemi yongya liasü. Item yimitem nung tebour tajung ali telemok, tenem nung tzüpokdak, arem min tulu, süngo lu tulu, rür agi meyibanga aliba tenem, ayong tulu, sobaliba balala aser benjongbentsü agi tourist tem atsür arur. North East India nung alima tebour tajung aser sobaliba tabu balala agi sünga lir aser item tayimtsü ya ajanga senzüsemponger aser tourist atema lenmang tajungba lapoktsütsü. Item tayimtsü atema www.airindia.in nungi tali tejangjaba metettsü.

GPRN ajanga Asür Lisechum Sangtam asükhu lemsatep

Dimapur, Yimpoksüi/Nov. 19 (TYO): Tuensang nungi Kilonser Lisechum Sangtam, ajungbena November 18, 2021 nü asüba atema Government of the People's Republic of Nagalim (GPRN) ajanga mang ayimer aser tejamsh lemsateper, ta M. Daniel Lotha, Kilo Kilonser, GPRN ajanga sangdong ka nung ashi. Pa ya United Sangtam Region kübok Chungtor yimtsüng nungi lir. Pa ya Naga linük tenzüksü wadang nung 1990 küm tenüng zülüoka liasü. Pai tasünü tashi manokshiba

tanüla nung Naga lima tenzüka liasü. Pa asüba ajanga tawa adokdaksüba kanga jangja metettsü, ta ashi. Tang mangyim tejamsh agi sünger aliba mapang GPRN ajanga mangyimer kibong asoshi sarasademtsür aser asükhu lemsateper. Pai linük tenzüksü wadang nung tsüngnep yutsüba teti alitsü aser pa ya chichiba Naga nunger meimba nisung ka ama züngshitsü, ta ashi. Pa tanüla teti tatem makaba kidang tesunep nung anisüngzüksü, ta GPRN sangdong ajangasa ashi.

SDO (C) Wokha-i metetdaksür

Wokha, Yimpoksüi/November 19, 2021 (TYO): SDO (C) Wokha-i sangdong ka ajanga, Wokha town nung November 22 nungi 27, 2021 tashi COTPA, 2003 nung Compliance Survey agitsü, ta metetdaksü. Investigating team-i Sorkar Office, School, Hospital, Hotel,

Restaurant aser temesepba chiyongtsü (tobacco) ayokba dokantem densen nübür kazüba tesemtem semdangtsü. Anungji, iba survey dak sendakba nung ajaki team den amalitepa inyaktsü asoshi mepishir, ta kasa sangdong nung shia lir.



Agartala nung civic election atema mapa lemzükba sorkar mapa inyaktermi postal ballot anasa vote enoktsütsü atema atatepdang agiba noksa angur. (Agartala, November 19)

Mizoram nung COVID ajanga nisung 6 asü, 497 dak putet

Aizawl, November 19, 2021 (Agencies): Mizoram nung taoba ghonda 24 tsüingda COVID-19 ajanga nisung 6 süogo aser nisung 497 dak putet. Tang tashi nung COVID-19 ajanga asür nisung 473 kümogo aser nisung 1,30,912 dak putet,

ta health department ketdangsür kati ashi. Tanü puteterem rongnung Aizawl nung nisung 200 aser Khawzawl o Serchhip nung nisung neterpungugu (75) dak putet, ta paisa ashi. Taoba ghonda 24 tsüingda COVID-19 puteta alir nisung

838 tashi taneptsü angu aser parnok züingsema taneptsü angur ajak agi 1,25,170 lir. Tang nisung 5,269 anepaludar ta ketdangsürisa metetdaksü. Mizoram nung Brihostibar tashi nung sample 13.91 lakh tendangogo aser yashi sample 3,692 tendang.

Meghalaya CM-i Me'gong Festival lapoktsü

Shillong, November 19, 2021 (Agencies): Meghalaya chief minister Conrad K. Sangma-i yashi Garo nung indang Me'gong Festival lapoktsüogo. Taküm benjungmong nung Meghalaya nung dak alaka Arunachal Pradesh, Sikkim aser Assam nungia nisungtemi shilem agir. Tura tezülen aliba Babadam nung benjung lapoktsüdang chief minister Conrad-i "Meghalaya küm 50 ajungba aser India nüjiso ngur küm 75 ajungba benjung den külemi iba benjung amonger" ta ashi. Me'gong Festival ajanga Tourism Department-i Meghalaya kübok Garo Hills

ya tourism destination ka ama sayutsü ta pai ashi "Covid wara ajanga tourism industry nung kongshiogo saka tang tensa tajungba akümba ajanga state sorkari tourists atsür arutsü atema sentong balala inyaksü atonga lir" ta Conrad-isa shisem. Iba sentong nung Chief Minister Conrad-isa 'Meghalaya at 50' indang logo sayatsü. Iba mapang MLA Thomas A Sangma, MLA Marcuise Marak aser Deputy Head of Mission, Embassy of Sweden in India Gautam Bhattacharya nung liasü. Meghalaya state kümteter küm 50 ajungba atema sentong aser benjung balala ayonga agitsü aser tatem nung

sangküm January 21 nü Shillong nung iba benjungmong tembangtsü. Meghalaya chief minister-isa Chidikgre nung "Tribal Research Institute" (TRI) lapokba indang osang metetdaksü. "TRI ajanga sobaliba balala indang research aser documentation asütsü maongka agütsütsü. Onoki iba centre ya Northeast nung kin ajak atema lapoktsütsü" ta pai ashi. Sangküm asür PA Sangma tasoba anogo nung Tribal Research Institute lapoktsü ta Conrad-isa shisem. Sangküm nungibgo Me'gong ya TRI campus nung kümshia ayongzüka amongtsü, ta paisa ashi.

Goalpara hospital nung mi lendong atalok

Guwahati, November 19, 2021 (Agencies): Hokolbarnü Goalpara Civil Hospital nung child care unit nung mi lendong ka atalok saka iba nung nisung yiruyibong asüba osang kecha mali. Tanep 9:30 ako meta child care unit nung mi lendong

atalokdang kinü tanur 14 tashi tangaleni aniena liasü. Miji komaser atalok'ar mejangja saka staff-i fire extinguisher ka amshia miji remsep ta osang angazüker. Assam nung tan ita tsüingda mozü kidang mi lendong anaben tashi atalokogo. November 10

nü Assam Medical College and Hospital (AMCH), Dibrugarh indang pediatric ICU nunga mi lendong ataloka liasü. AMCH indang incentive care unit (ICU) nung mi lendong atalokdang kinü tanur 12 lendong nungi tera agi dang jenbua liasü.

Darrang nung 'Yellow line' campaign tenzük

Mangaldai, November 19, 2021 (Agencies): Assam kübok Darrang district nung shisaliok rejutem ajak tobacco-free kümdaktsütsü atema 'Yellow line' campaign tenzükogo. Shisaliok reju anasa 100 yards (91 meters) telongtet

nung 'yellow line' ka yanglutsü aser iba ya moko ayokertemi atema 'Lakhsman rekha' ama amshitsü. Iba yellow line adenra parnok dang Act -COTPA, 2003 kübok Rs 200 tashi senchi achitsü akok. District Health Society kübok

District Tobacco Control Cell (DTCC)-i iba campaign tenzüksü. "Mezüng shilem nung Mangaldai aser Kharupetia nung aliba secondary level reju kar nung iba campaign inyaksü" ta DTCC nodal officer, Dr Nirmal Kr Beria-i ashi.

Tripura nung BJP-TMC züingsemtem raradang nisung 19 asü

Guwahati, November 19, 2021 (Agencies): Tripura kübok Khowai district nung BJP aser TMC züingsemtemtsüingda raratepdang nisung 19 tashi yiru. Iba lendong atalokba sülen Teliamura tesem nung CrPC Section 144 ozüing agütsüogo. Civic body election agitsü jakdang lendong atalokdang police ana tashi yiru. "Tanü nungi tenzükur November 24 tashi Teliamura Sub Divisional Magistrate Md Sajjad P-i Teliamura Municipal Council nung section 144 alitsü ozüing agütsüogo" ta sangdong ka ajanga metetdaksü. "Bodbarneep 9.30 ako meta TMC züingsemtemi Kalitila nung

BJP office ka anasa lungkak aitba sentong ka agidang mepetmesü adok" ta Assistant Inspector General of police (Law and Order) Subrata Chakraborty-i ashi. Iba mapang police-i telok anaprong timi süngiemdaksütsü merang saka makokba agi tear gas shells amshitsüsa aküm, ta Chakraborty-i ashi. Iba lendong nung police ana dena nisung 19 yiru ta paisa shisem. "Okadaki November 25 nü election timi agitsü atema tetuyuba agüjaka ozü candidate aser züingsemtem amaker" ta TMC lennir Sushmita Dev-i ashi.

Guwahati nung auyaba mobile 15 ngutet



Guwahati, November 19, 2021 (Agencies): Central Guwahati Police District SOG aser Noonmati Police telok kati Brihostibar aonung nisung 6 apu aser parnok ket nungi heroin gram 6.29, auyaba mobile phone 15 aser sen apu. Miim osang ka angazükba sülen SOG aser 152 BN G coy personnel külem telok kati Noonmati kübok Housing colony nung mita ao. Iba mapang parnoki Birgu Sing Bordoloi aser Hirakjyoti Nath na apu. Birgu Sing ket nung auyaba Mobile handset ka ngutet.

Tenati nangzükba nung ajemdaker police-i Hanif Ali, Md Sirajul Islam aser Md Suraj Jaman Sekh nung ket nungi Mobile handsets 10 ngutet. Iba ken o nung tongti süa tai tongloktsür Birgu Singh Bordoloi dang balaka asüngdangya asüandang ashiba nung ajemdaker Alok Gogoi'er kidang ano mobile pezü ngutet. Parnoki ki mita aodang heroin gram 6.29 den auyaba mobile handsets 4, Rs 38,020, sapon pongdang ana, plastic containers 10 aser lighter ka ngutet.

GOVERNMENT OF NAGALAND
DIRECTORATE OF SCHOOL EDUCATION
NAGALAND : KOHIMA
PRESS RELEASE
Dated. Kohima the, 16th Nov' 2021

NO.ED.EL/ADV/EXAM/2021:: In countinuation to thisoffice advertisement of even Dated, Kohima the 10th July 2021 and in compliance to the Hon'ble Gauhati High Court Kohima Bench, Court Order in Writ Petition (c) NO.16(k)2018, Dated Kohima the 17th march 2020. It is hereby informed that the candidates who have appeared the written examination for one (1) Primary Teacher post at GPS Phiro Village-Bunder the establishment of the Sr. Sub-Divisional Education Officer, Wokha, which was held on 25/09/2021 at Samagra Hall.The following candidates with the roll numbers have qualified for the viva-voce.

Sl. No	Roll No.	Sl. No	Roll No.
1	135	4	139
2	136	5	134
3	133		

- The Viva-Voce shall be held on 29/11/2021 at the Directorate of School Education ,Kohima from 11.00 on wards.
- All the selected candidates are requested to reach at 10.00 am along with the relevant educational documents in original.

(SHANAVAS.C, IAS)
Principal Director



TIR YIMYIM YIMOBILEM (EDITORIAL)

DIMAPUR

KÜPTOKNÜ

YIMPOKSÜI 20, 2021

Kanga pelar, Dr.Clark !

Joko, asen limai Yisu Khrista temeim osang tajung arua tonger 2022 kum, kum 150 ajungba Sesquicentennial benjongmong amongtsü. Atangji, taoba kum ajak dang nungi 2022 kum yasa asenok Yisu Khrista dak amangertem asoshi tepelatiba aser tongtibangtiba kum asütsü. Asenoki junga mamangtetter dang ashi, kum 150 jakdang Tsüngremi asenok nem moatsüba Molungkimong lushi nung Tsüngrem tenyar Dr. E.W.Clark tonga atuagi limapur liasüba purtem temulung meyipa tzüsentsü tenzükba nungi tanübo asenok ajak Khristan kümer tetsübu mali pelatepa asenok onüleni oa, asenok inyaknüsü inyaka aliba ya Tsüngrem temeim aser taochi kanga tulu agi kumzükbayong lir. Kum 150 jakdangbo, asen tsüraburtembo tsükchir tsübu agi pei lui aotsübjaja tetsübutü aser tarendaktsüka liasü. Parnokbo temang ayima süoshia magi, mozü memetet, gari mengu dang, azüngtsü aser zülutsübjabo tangashia mangashi, anogo aser ita azüngtsüa yong dang süka azüngba mapang, shirurua masü aser meimchira masü ta aliba tiaji Tsüngremi Pa tenyar Dr.Clark nem ngudaktsü. Sibsagar anasa Naga tenem nung alirtem tiaji ngua Dr.Clark mulung animesüngzükteni akümbaji, Tsüngremi Ao kin samatsüba tia nungi kumzüktsü asoshi Pa taochi sentong tenzükba mapang ka liasü. Aji oda, Dr.Clark asen lima tonga aruagi asenok dang Tsüngrem temeim osang tajung shia kumzükba mapa ya asenok tanüla dang masü saka shi temang dena kumzükba Tsüngremer tesüngmangtsü taochi mapa ka lir. Ashiko, kum 150 jakdang Dr.Clark-i asenok dang Tsüngrem temeim otsü ashitsü aria bilema maru asübo, asen tsüraburtem aika tsükchirtem nok agi lepseter lila aser yimtsüngtema aika mali küma makdoker lila. Iba tensa tiaji kodang bilemdangdir, Dr.Clark asen limai maru ser, asen tsüraburtem tsükchir ket nung sama asübo, tanü asenok alima nung taküm lila na (?) ta bilemer. Aji oda, Dr. Clark ajanga asen tsüraburtemi Tsüngrem temeim angateta tsüngremtem madak Tsüngrem aser kiburtem madak Kibur dak mejenok asübo, tang asenok Sesquicentennial amongtsüba sentong yabo yutsür, asen yimer aser asen Ao kin ya kechi kümer lila ta shisabolua bilemer. Asenok melidang aser asenoki manguba agi zübazüba jembir dang ashi, Teyanglur Tsüngrem külemer masü saka Teyangluri yangluba süng aser long külema nisung tepsetba agi benjong monga pelatepba putuji tetsübutü putu liasü. Item lendong timtem ajakji tizükteta Aotsür Aortem kumzüktsü mechi, pei ki aser pei lima tajung toktsür, Dr.Clark asenok shiruru jenjang nung lia aliba purtem alidak tonga aruagi, külemi lia Yisu temeim osang tajung agi tanüla nung dang masü saka shi nung dena nüchi kümdaktsüba temeimji asenoki pa nem kodang komaser meyipa agütsütetsü ? Molungkimong yim kümteta alidak aliba dang masü saka ano Dr.Clark-i anir Khristan yimsü aser sobaliba nung Molungyimsen küma, ano yang nung jagi asenok yim ajak Tsüngrem yimli osang tajung agi atongba dang masü saka ano pa kinungtsü tenati asenok nem zülutsü aser azüngtsü sayua angazükdaksüba temeim aser teyariji asenoki kechi temeim aser teyari den medemdangtetsü ? Tanübo asenoki asen arogo nung alirtem kiboksemia mouner, gari nung mener sayutsüngi aobaji tuluka amai bilemer aser pei ki aser kinungertem toktsür bendang lima nung oagi Tsüngrem mapa inyaksübjaji takoksa tulu angutsüba mapa ka inyaker amai bilemer. Ajisüaka, kodang asenoki America lima nungi pei akaba ajak toktsür, rongsen bushia masü saka samaa aliba tanülatem bushia aruba Dr.Clark aser kinungtsü Mary Mead na taküm aser mapatemji asen taküm aser mapatem den medemdangdir, Tsüngrem tsüngdang, Adam o Kain na amato, konganga matsük ka asütsü. Aiben asenoki arogo kum nung tain akümba, nütsüng zünba, gari tajung ka nung arogo tenüng zülur jajaba aser tenla ki tulu tajung yanglutetba mapatemang Tsüngrem sentsüwangshidaktsüba mapatem amato züngshir. Ajisüaka, Yakobi ashi ama, item jagi asenok bangsenteper. Itemji Dr.Clark-i sayuba Yisu yimsü amangertem mapa aser jakla masü. Asenokbo Dr.Clark-i asenok dang kechi koma Yisu temeim sayua asenok nüchi kümdaktsü, yamaji asenokia tangar tanüla aser taküm karbosa kumzüktsü merangtepdi. Kenü item osangji bener asenok kotak lima atongdang, tamasa Dr.Clark bushia orr, pa dang "Kanga Pelar" ta ashitsü mamali.

OLEMSABANG

Molungyimsen asü shiri tamashi mapa inyaker ?

Lima Tzudir, Dimapur

(Yashi adok nungi...)

Atangji Molungkimong nungi arogoji Molungyimsen-i belener mao yutsü asübo Merangkong nung tenzükba arogoji tasembuba ang asütsü saka Rev. Dr. E.W Clark-i Merangkong nung Arogo tanabuba tenzükba jangjangja zülüja lir. Pai züluba ama English oshi nung dang agütsür: "There are two churches in this tribe of Nagas, one at Merangkong, and one at this Molung village. (Rev. E.W. Clark, Mission to the Nagas in The Baptist Missionary Magazine, August, 1884.P.324)."

November 5 nungi 8, 1898 tashi Impur nung Ao Mungdang sentep aser iba mapang arogo tenzükta aliba tenüngtemji: Molungyimsen, Merangkong, Lirmen, Wamaken, Yajang aser Impur ta zülua lir. Item arogotem rongnung Molungkimong dena mali.

Ano arogo otsü zülur nungtugu Dr. Joseph Puthenpurakal-i züluba Baptist Missions in Nagaland, (1984) nung yamai shia lir, "in 1883, giving a report of the churches in the Naga Hills, Clark mentions only two organized churches, namely Molung (which is the same as Molungyimsen) and Merangkong. If there existed a third one, he would have been the first to report it to the Committee in America (p.86)."

Rev. Clark-isa yamai zülua lir, "The year closing with December, 1892 presents no startling facts. One new church has been formed. It is in the village where the first baptisms were performed in the Naga Hills. It was because the Christians were persecuted so much in this Deka Haimong village that they were induced to form the new village Molung. But the chief persecutors have died; several Christians have gone there from other villages. These were formed into a church, and three were baptized, two of the three being chief men of the village... (The Naga Mission. Rev. E. W. Clark Amguri, April 3, 1893"

Kuli aika rongnungi item kuli kar ajanga 2022 nung Molungyimsen Baptist Arogo kum 150 ajungba tenüng nung Sesquicentennial benjung amongtsü temsüa aliba metentsür aser iba ya tamashi mapa ka masü anungji iba ochi anema noktaktertem asoshi sasaa bilemetsür.

O tembang: Tesüba nung atalokadoker aliba otsü ka tanü tanaben yanglushitsü mesüra meyipsatsü merangba yabo kangasa tamashi aser metongi inyakba mapa ka lir. Talisa Naga lima nung Osangtajung bener arua prokshiba indang otsü yabo iba mapang missionary aser parnok den külemi arua inyakerteri kanga dang jangjangja tezüluba nung yuja lir. Anungji tebang agi otsüji koma'ar ka puradanga aser melendanga jembir nunga, tatem nungbo zülua aliba kulitem (documents) aser manuscripts nung kechi lir idakjisa tembangtsü.

Anungji December 23, 1872 (Dec. 22, 1872) nung Rev. Dr. E.W. Clark-i Naga lima nung mezüng tenzüktsüba Ao Naga arogoji Molungyimsen nung belenoker taküm lir aser tanü iba arogoji kum 150 ajungba benjung amongtsü lia ABAM Sanen Luden-i lemtet tai ka nung ajemdaker, ken o tanaben kakteta jembidang Aor shisashirtem aser researcher temi mezüng missionary aser parnok den külemi inyaksemertemi zülua yutsüba kulitem (documents) aser manuscripts repringdanga ochiba metetdakjang aser kangasa tamashi mapa inyakba ya joko ojang dang inyakdakjang ta ayongzükter.

(Naga lima nung mezüng inyakerteri zülua yutsüba kulitem (documents) aser manuscripts züngdangnura Molungyimsen Baptist Arogo ket nung peria lir. Ano talila tejangjaba nung metetnura American Baptist Historical Society, Archive, Atlanta, Georgia nung angutsü.)

- *Yimozülur dangi* -

Ni züngshiba kakat ka

Dr. N. Tiameren Ao
Professor
NU; SASRD

Wood Publisher Kohima ajanga taküm (2021) adokba 'Mamatetba Küm Tatem School Benjong' kakat ya nia züngdangogo aser kanga shisa kaa (brilliantly) apiteta (imagined) aser tobur junga zülügo. Tezülur P. Alem Jamiri tanü tensa school tanurtem yimya libaliru aser jembishinü nung ajemdaker tasa kaa züluba den (skillfully written), otsü nung shilem agirtem ya kangasa asangsang süa zülutetogo. Iba kakatnu ya tainlonglong tanurtem dak rangloker parnok asoshi zülü asünung ashiko taintemi tanur kakat ama bilema mezüngnüsüa akok saka tongtibangsa tanur alir tsürabur aser tanur lenirtem ajak angazüktsüsa ibai zülua lir. Iba kakat nung tanü asüng tanurtem angateta anishitsü shisa tajung O, tebilemdangtsü O aser temenünüsü O aika lir.

Kakat ya tanur tain ajak shisatsü angutsüsa züluba den iba ya ajanga Ao kin oshi renlokaktsüba nung shilem tajung agiogo aser tanü asüng lima den lirumedema zülügo ta pelar. Benjamin-i memeteti pa senior Retuuf (jumble word of Future) den medema arudang Retuuf jagi pa nem shisatsü jenti agüja len ania arur tatem nung Benjamin takoker ka akumba angudang tzüratema bilemogo. Tongtibangsa Ao kin asoshi ano tarutsü nung yamala yimdangiem otsü apiteta zülutsü ajungshir. Ni tesayur ka aser tang tainlonglong tsürabur ka dang masu kakat azüngtsüa jangrar, anungji, iba kakat azüngba nung ni tajangzük anguba kuli asur.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

ABAM asoshi 2022 küm ya Sesquicentennial küm asütsü



Impur, November 19 (TYO) : Taruba 2022 küm ya Ao limai Yisu Khrista temeim osang tajung arur küm 150 ajungba mong Ao Baptist Arogo Mungdang (ABAM)-i ayongzüka amongtsü. Aser iba Sesquicentennial omen "Tsüngrem dang Sentsüwangshi" asütsü shimteta alinungji, kasa omenji 2022 küm ABAM omen asütsü ta tan amongba ABAM lokti senden nung lemtetogo.

Taküm 2021 küm Ao Baptist Arogo Mungdang (ABAM) 125 buba küm tatem

mungdang November 18 nungi 19, 2021 tashi takok ngua agiogo. Iba lokti senden nung arogo 161 aser Fellowship 9 nungi sannükertemi anir arogo nunger ajak agi 814 arua dena liasü.

Iba mungdang sentong nung Dr. I. Lolen Imchen, ABAM tir ajanga tayongzüka agütsüba mapang, I Samuel 13:8-13 nung ajemdaker, Tsüngremer wadang takok angutsü asoshi asen tangatetba nung masü saka Tsüngremeri mulungba nung inyaktsüla, anungji asenok ajaki Tsüngrem

nungi shisatsü aser tangatetba meshia inyakdi ta ayongzüka. Iba kasa mungdang sentong mapang, ABAM Executive Secretary, Rev. Dr. Mar Pongener-i Sesquicentennial jeli sangdong minute 5 video ka sayatsü aser ibaji ABAM YouTube channel nung enoktsüogo.

Iba kasa mungdang nung 2022 küm asoshi ABAM tir Rev. Sentsashi, Pastor, Kohima Ao Baptist Arogo aser tadong tir Rev. Temshi, Pastor, Changtongya Town Baptist Arogo asütsü shimtetogo.

ANO GO ABEN TSÜNGREM DEN

Ochi jagi na nüji kümdaktsütsü

"Aser nai ochiji metettsü, aser ochi jagi na nüji kümdaktsütsü." Yohan 8:32.

Tsüngremer ochibai kodanga na menokdang; iba yagi na teti nüji kümdaktsür! Na tasü meiti lir asü? Temenen kar madak takok mengui lir asü? Lendong aketba chiyong kar lar kuma lir asü? Tsüngrem indang ochibai na nüji kümdaktsütsü ta mangateti alitsü akok.

Ne jakdang tayongzüka den ajuruteptsü na tasü meiti lira, Filipi 4:13 nungi tasü aittsü angazükang: "Khrista shibai ni tasü itdaktsür Pa ajanga ni ajak inyaktsü akok." Tensa ajanga nai tamakok ngua lira, Rom 8:28 nung shia aliba nung azüitang. "Tsüngrem meimertem asoshi mapa ajak tajung asoshi inyaker." Na temenen kar lar kuma lira 1 Yohan 1:9 ochiji ne taküm agi inyakang, koba nung nai temenen nangzükra, memeshiba ajak nungi na merüktetdaktsütsü Tsüngrem tamang katetta lir. Item ajak ne taküm nung Tanela Temeshi-i inyaktsü ataa lir.

Ne taküm nung Tsüngrem ochibai mapa inyakba metettsübaji ano mapa ka lir. Tsüngremer ochibaji nai magizükra aser mamangra ochi jagi ne taküm nung mapa meinyaktsü. Tangar taküm nung mapa meinyaktsü. Tangar taküm nung Tsüngrem aini mapa inyakba nai angashia alitsü akok. Saka item ochibaji ne taküm nung inyaktsü nai Tsüngrem dang melaa lir ma? Tanü nü taküm nung ochi inyaktsü Pa dang asüngdangang.

Khristmas mongpu anasa Church of Nativity yanglushiogo

Bethlehem, November 19 (Agencies): Khristmas atongtsü lia West Bank kübok Bethlehem nung Church of the Nativity yanglushiba maparen renemogo; iba Tenla ki ya küm asem tashi yanglushia liasü aser tawa mapa ajak temogo.

Bethlehem nung Church of Nativity Tenla ki ya Yisu Khrista asoba tesem nung yanglu, ta Khristantemi amanger. Iba Tenla ki kanga junga yanglushiaka taruba Khristmas mongpu nung raliwalir ishikati dang semdangtsüa akok, ta bilemer.

Yaküm coronavirus wara prokba mapang nungi tenzüka raliwalirtemi Bethlehem nung aliba Tenla ki ya mesemangteti liasü. Küm shia Khristmas mongpu nung raliwalirtemi iba Tenla ki kanga sapua semdang.

Tan ita tetenzüklen nungi Israel-i vaccine dose anaprong agia alir bendangertem atema arrtsü lapoktsüogo, ajisüaka takümbo Khristmas nung raliwalir kari dang Bethlehem semdangtsüa akok, ta bilemer. Raliwalir timbakati Bethlehem semdangtsü atema tayimtsü ajanga Israel-i aoer, kechiyong West Bank nung airport ka danga mali.

November ita tesadang tashi nung raliwalir 30,000-i dang Israel semdangogo; coronavirus wara meprokdang 2019 küm November ita nungbo raliwalir 421,000-i Israel semdanga liasü, ta Israel Interior Ministry-i metetdaktsü.



November 16, 2021 nü raliwalirtemi Bethlehem nung aliba 'Church of the Nativity' semdangba noksa nung angur. Church of the Nativity Tenla ki ya Yisu Khrista asoba tesem nung asü, ta Khristantemi amanger.

Palestinian Tourism Ministry nung director of marketing, Majed Ishaq-i, Khristmas mongpu nung Bethlehem aser West Bank nung aliba yimitem semdangtsü atema Israel nung Palestine sensotem ajungshitsü asoshi ministry-i campaign ka tenzüko, ta metetdaktsü.

2013 küm nungi tenzüka dollar sen million aika indoka Church of the Nativity yanglushiogo. Palestinian presidential committee leniba nung iba Tenla ki yanglushi.

Bethlehem Development Foundation director, Mazen Karam-i, ano mapa kar anüngzüka lir; tang tashi nung dollar sen million 17 indokogo, saka maneni Tenla kidang firefighting aser micro-climate

systems inoktsü atema sen million 2 shi nungdaker, ta metetdaktsü.

Iba Tenla ki yanglushitsü atema America nunger Khristantemi tenla agütsü aser mapang ka nungbo iba tesem ya United Nations list for world heritage sites rongnung densema liasü.

Bethlehem nung Church of the Nativity Tenla ki ya temeshi lima- Israel semdanga temeshi aini aoertem atema nungtugu tourist tesem ka lir aser 2012 küm iba ya United Nations Educational, Scientific and Cultural Organization (UNESCO) World Heritage Site shima liasü.

Church of the Nativity Tenla ki ya 565 küm renema liasü aser 1480 küm iba Tenla ki

yanglushiba sülenbo khen danga junga meyanglushi aser iba

Nepal nung S.Korea tsür missionary tem bail nung chiokogo

November 19, 2021: Nepal nung South Korea tsür missionary nun ana ketdangsertemi apuba sülen ita ana shi tepuokdak liasü, saka November 18 nü court kati tena nem bail agüja chiokogo, ta osang ka ajanga metetdaktsü.

Nun ana jagi Hindu nunger mesüzüka Khristan yimsü dangi meyipdaktsür, ta tena nem tai tonglokja liasü.

Nepal yimtiba, Kathmandu nungi kilometer 200 shi pilar aliba Pokhara district nung aliba court kati nun anati agütsüba bail temepishiba agizüka tena den külemi South Korean Christian volunteers ana densema chiokogo.

Tenla ki chireptsüsa jenjang ka lia yanglushiogo.

Iba Tenla kidang tsüngbang, jara aser kishi aika yanglushiogo aser ibaji alima tesem balala nungi Khristantemi tenla agütsüba ajanga yanglushiba lir.

Coronavirus wara aliba den külemi ainlen senzüba nokdangba ajanga Bethlehem tourism tsütsü takoksa kanga angu. Church of Nativity ya 330s mapang mezüing asü aser 339 A.D nung semzüka liasü. Iba sülen küm 200 shi lir Samaritan revolts mapang mi agi tera raksatsü aser Byzantine Emperor Justinian-i tanaben yanglushi. Iba site nungsa Latin, Greek Orthodox, Franciscan aser Armenian convents aser Tenla kitem lir aser temeshi ainlen jajartem atema lenmang ka lir.

Lower court kati missionary nun Sister Gemma Lucia Kim aser Sister Martha Park Byongsuk na bail temepishiba magizük, anungji Arogoi higher court ka nung kasa bail temepishiba agüja liasü, ta Catholic Arogo lenir kati metetdaktsü.

"Tanü higher court-i parnok bail nung chiokang ta tuyu, anungji iba ken o ya tanaben lower district court level dangi aotsü. Nun ana den Khristan volunteer anaji chiokogo saka agüja aliba anogotem nung ken o angadangtsü atema lower district court matsüngdangi aotsüsa akümtsü," ta November 18 nü Arogoisa metetdaktsü.

OLONG PAITEP # 6002

1				2					3	
						4		5		
6			7							
						8		9		10
11										
12		13						14		
			15							
								16		
	17									
						18				

- | | | | |
|-----------------------|--------|-----------------------------------|-------|
| TIPIEN | | LANGTSÜNGLEN | |
| 1. Yakob tetsü | - (6) | 2. _ _ _ gki | - (3) |
| 4. Mezüng nisung | - (4) | 3. Telungpur telok ka | - (2) |
| 6. Tasen lai kaket ka | - (5) | 5. Tsüngremi mezüng poktetdaksüba | - (5) |
| 9. Au lanu | - (2) | 7. Tia | - (4) |
| 12. Tejen lai 21 buba | - (11) | 8. Yakob-er jabaso ka | - (5) |
| 15. Tekolak tembar | - (2) | 10. Abraham tebutsü | - (4) |
| 16. Zütsüra anepsang | - (5) | 11. Rebeka kinungpu | - (4) |
| 17. Kain tenu | - (4) | 13. Esau tenu | - (5) |
| 18. Hana-er jabaso | - (6) | 14. Tzünglu tilala aru | - (4) |
| | | 16. Jafet tebu | - (3) |
| | | 17. Teka agi kongshi | - (2) |

OLONG PAITEP # 6001 TELANGZÜBA

- | | |
|--|---|
| TIPIEN : | LANGTSÜNGLEN : |
| 2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso, | 1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata. |


Noksa nung meputepi aliba 11 bushiang



TANÜBO NAI LANGZÜANG

Q. 'Regional Plan of Action for Adaptation to Drought' ya ____ den sendaktepa lir.
 [A] G-20 [B] BRICS [C] ASEAN [D] BIMSTEC
 _____ (Taruba adok nung onoki langzüsü)
YASHI ADOK TELANGZÜBA: Sri Lanka

AO OSHI ANGAZÜKDAK:
TANÜ ANGAZÜKTSÜBA OJANG



Leprep
 (adv) ajak lepdok (cut down all)
 * Yim nüngdak nung agitsü atema ozü süngwa leprepa alep.

Lepsa
 (v) tulu agi tilaba küma alangsa (cut into pieces)
 * Tanurtemi süngwa nung süng tajung aika lepsa.

NAI-A YA METETTER MA

November 20 nü asor tongtibang nisung kar:



- | | | |
|-------------|----------------|--------------|
| Tipu Sultan | Pope Pius VIII | Edwin Hubble |
|-------------|----------------|--------------|
- Sultanate of Mysore, Karnataka, Tipu Sultan (1750)
 - Pope Pius VIII (1761)
 - Astronomer Edwin Hubble (1889)
 - Author Nadine Gordimer (1923)
 - U.S. Sen. Robert F. Kennedy, D-N.Y (1925)
 - U.S President Joe Biden (1942)
 - Rock and Roll Hall of Fame member Joe Walsh (1947)
 - Former national security adviser John Bolton (1948)
 - Actor Sean Young (1959)
 - Country singer Dierks Bentley (1975)
 - U.S. Olympic gold medal gymnast Dominique Dawes (1976)

SUDOKU # 6043 **TELANGZÜBA # 6042**

			9	8				2		3	8	2	5	1	6	7	4	9
	9						3	5		4	9	7	8	2	3	6	5	1
					4	9				6	5	1	4	9	7	3	2	8
				1	6					8	1	3	6	4	2	9	7	5
8	2	7						4		9	7	4	1	5	8	2	6	3
			3							5	2	6	7	3	9	8	1	4
2	3		5							7	3	5	2	8	1	4	9	6
			1	6	2	3	5	8		2	4	8	9	6	5	1	3	7
7	8									1	6	9	3	7	4	5	8	2

OJANG LUTEP # 5589

KAÜÜMS	:	<input type="text"/>
HTIASSSÜ	:	<input type="text"/>
AAANGJ	:	<input type="text"/>
DOENNLG	:	<input type="text"/>
BNEER	:	<input type="text"/>
UARR	:	<input type="text"/>
KASA	:	<input type="text"/>
RMAJEALUI	:	<input type="text"/>
LMAAI	:	<input type="text"/>
MDAKGJETNSSÜÜR	:	<input type="text"/>

OJANG LUTEP TELANGZÜBA # 5588

LOKTI TEJAKLENI AOTSÜ ATEMA AJAK
AMALITEPA INYAKTSÜ KANGA DANG TONGTIBANG

TAN HOPTA ATEMA - KOMA SÜLA ?

Q. Nagaland government-i bilemba ama, Nagaland nung Municipal aser Town Council-tem ya election magii dang tentet nunga koma süla ?

Aluyimba ozüngtemji Parliament nung agentsüla: Rakesh Tikait



Hyderabad, November 19, 2021: Centre sorkari aluyimba ozüng tasen asem agienba sülen Hyderabad nung lokti tentet balala nungi züngsemtem benjungtepba noksa nung angur. Hokolbarnü ajungbena Ato kilonser, Narendra Modi-i, sorkari aluyimba ozüng tasen asemprong agentsü, ta sangdongogo.

Ghaziabad, November 19

(Agencies): Hokolbarnü Ato kilonser, Narendra Modi-i sorkari aluyimba dak sendakba ozüng tasen asem agentsü, ta sangdongba sülen Bharatiya Kisan Union (BKU) lenir, Rakesh Tikait-i, aluyimba ozüngtem anema longkak aitba ya tangbosa manentsü, kechiyong ozüng asemji Parliament nung agentsüla, ta metetdaksü.

BKU lenirisa, Parliament nung aluyimba ozüng tasen asem agienba sülen ang aluyimertemi longkak aitba anentsü atema telemtetba agitsü, ta metetdaksü.

Iba dak alia minimum support price (MSP) dak sendakba nung sorkari aluyimertem den jembitsüla, ta aluyimertem leniri metetdaksü.

BKU otongdar, Tikait-i Hindi oshi nung twitter ajanga,

"Longkak aitba ya tangsabo manentsü. Parliament nung item ozüng agienba onoki atatsü. Sorkari MSP densema tanga onük balala atema aluyimertem den jembitsüla," ta metetdaksü.

Guru Nanak asoba anogomong nung Ato kilonseri, aluyimba ozüng tasen asem ya aluyimertem tajangzük ngudaktsütsü atema benok, ibayongji onoki aluyimertem nem ibaji angatetdaksütsü merang saka aluyimer telok kar onoki makok, ta metetdaksü.

"Aluyimba ozüngtasen asem benokba nükjidongji aluyimertem, talisa tilateri aluyimertem nem tashi agütsütsü atema liasü," ta paisa metetdakja liasü.

Yaküm November ita nung sorkari aluyimba ozüng tasen asem agizükba sülen nungi state balala nungi aluyimertem Delhi arrtsülen adenshia longkak aitba

tenzüka liasü aser tanü tashi aluyimertemi longkak aiter.

Yaküm November 26 nungi tenzüka Punjab aser tanga states balala nungi aluyimertem Delhi arrtsülen lenmang balala nung adenshir longkak aita arur; aluyimertem aser sorkar tsüingda senden aiben menogo saka telemtetba kecha magiteti liasü.

Sangküm küm tetenzüklen aluyimertem aika aliba state tem- Punjab, Uttar Pradesh aser Uttarakhand densema state pongu nung assembly election agitsü lia BJP-i aniba sorkari aluyimba ozüng asemprong agentsü telemtetba agiogo.

Tawa state aika nung by election nunga BJP-i tamakok ngua liasü, aser ibaji ajanga sorkari aluyimba ozüngtem agentsü telemtetba agi, ta bilemer.

EAM, Jaishankar-i Singapore nung minister aika den senden amen

Singapore, November 19

(Agencies): Hokolbarnü India External Affairs Minister, S. Jaishankar-i Singapore finance Minister aser health minister den senden mena linük ana tesendaktep aintsü aser health security tsütsü amalitepa inyaksü atema jembio.

Jaishankar-i Singapore Finance Minister, Lawrence Wong den lenla balala nung linük ana tesendaktep aintsü

atema o lemtepa liasü.

Paisa Health Minister, Ong Ye Kung den senden amendang coronavirus wara aser health security tsütsü linük anati amalitepa inyaksü atema jembio.

Hokolbarnepai Bloomberg New Economic Forum nung "Greater Power Competition: The Emerging World Order" onük nung o lemtepa nunga shilem agia liasü.

Iba forum sentong nung

taoba mapang US Secretary of State, Hillary Clinton aser taoba mapang British Ato kilonser, Tony Blair nata densema liasü.

Brihostibarnüa Jaishankar-i Singapore Senior Minister & Coordinating Minister for Social Policies, Tharman Shanmugaratnam ajurua senden amen. Tenati tang alima nung rongsenkettsüing tensa atema o lemtepa liasü.

India nung nisung 11,106 dak coronavirus putet aser 459 asü

New Delhi, November 19 (Agencies): India nung ano nisung 11,106 dak coronavirus putet aser iba tashidak agi shiranger 459 süogo, ta Hokolbarnü Union Health Ministry-i metetdaksü.

Tang tashi nung India nung nisung 3,44,89,623 dak iba tashidak putetogo aser iba tashidak agi asür ajak senteper 4,65,082 jungogo.

Hokolbarnü coronavirus agi shiranger 12,789 anepogo aser tang tashi nung linük nung iba tashidak agi shiranger ajak senteper 3,38,97,921 anepogo.

Tesüiba ghonda 24 tsüingda coronavirus putetba nisung

11,106 nungjagi Kerala kija nungi nisung 6,111 dak putetba densema lir; iba state nungsa nisung 51 asü.

Tang linük nung coronavirus agi teshirangdakpur 1,26,620 dang kümogo, aser ibaji coronavirus caseload nungi shilem 0.37 dang lir, ta Health Ministry-i metetdaksü.

Tang anogo shia coronavirus positive putetba shilem 0.98 dang kümogo aser hopta shia positive putetba shilem-a 0.92 dang kümogo.

Tang tashi nung India nung coronavirus vaccine dose crore 115.23 dak tema agütsüogo.



November 19, 2021 nü Parliament, New Delhi nung Lok Sabha Speaker, Om Birla aser Congress Tir, Sonia Gandhi na densema lenirtemi taoba mapang Ato kilonser, asür Indira Gandhi nem akhüm agütsüba noksa nung angur. November 19 ya Indira Gandhi asoba anogomong lir.

Modi sorkari election nung tamakok angutsü tsübur: P Chidambaram

Panaji, Yimpoksüi/

November 19 (Agencies): Hokolbarnü Congress Party lenir aser taoba mapang Union Minister, P Chidambaram-i, Narendra Modi-i aniba sorkari aluyimba ozüng tasen asem agentsü telemtetba agi, kechiyong assembly elections agitsü mapang ana nung lir aser parnoki elections nung tamakok angutsü tsübur, ta ashi.

Goa yimtiba, Panaji nung osangbenertem den jembidang Chidambaram-i, BJP-i aniba sorkari Parliament mesüra democracy masü saka election nung tamakok angutsü ang tsübur, ta ashi.

Hopta asem tejaklen ang Ato kilonser Modi-i aluyimba ozüng asemji kodanga magientsü ta jembia liasü, ta Congress lenirisa ashi.

"Hopta asem tejaklen Uttar Pradesh nung sentong ka nung jembidang Ato kilonseri,

aluyimba ozüngtem anema nokdakertemji linük anemertem lir, ta jembio. Ajisüaka tanü kechi atalok? Goa densema state pongu nung taruba assembly elections nung parnoki tamakok mejungi angutsü tsübuba agi tanü ya (sorkari aluyimba ozüngtem agienba) atalokogo," ta pai ashi.

Assembly Elections nung tamakok angutsü tsübuba agi tanep ajungbena Ato kilonseri

aluyimba ozüng asem agentsü lemtepa sangdong, ta taoba mapang Union finance minister, Chidambaram-isa metetdaksü.

"Hopta asem tejaklen by election osang sangdonga liasü aser BJP-i Himachal Pradesh nung tamakok mejungi anguba den Karnataka aser Rajasthan nunga menden aika nung tamakok angu. Iba sülen nikongdang 3:00 ako tashi nungbo parnoki petrol aser diesel jenjang ajemtsü sangdonga liasü," ta pai ashi.

BJP-i aniba Centre sorkari tangar den mejembiteper, o lemtepa masür aser Parliament nung o toktepa nunga shilem magir, ta pai aitsü.

Kodang tekong temerang sorkar kati aluyimba ozüng nung atsü-anemdir, iba tetezü parnoki election nung tamakok angutsü ta metetba agi lir, ta Chidambaram-i ashi.

"Iba sorkar yagi democracy metsübur, iba sorkar yagi Parliament metsübur saka election nung tamakok angutsü dang tsübur," ta pai shisem.

Nüburtemi Modi sorkar melenshidaktsünüra election ajak nung parnok tamakok ngudaktsütsüla, ta paisa ashi.

"Goa aser tanüngba state pezü nung aliba nüburtemi taruba election nung BJP mejungi tamakok ngudaktsütsü, ta ni amanger," ta pai ashi.



November 19, 2021 nü Puducherry nung Veedur dam nungi tzü tali chiokba ajanga Sellipattu aser Kendikuppam na sendaktepba apo tzü agi metsüngbanga aliba noksa nung angur.

Pakistan-i far-right TLP lenir Saad Rizvi chiokogo Uganda police-i temolung malemer nisung pungo tepset



Islamabad, Yimpoksüi/Nov. 19 (Agencies): Muslim nunger timba aliba linük, Pakistan nung azüdokshia longkak aita aruba aser hopta aika jembishinüba sülen far-right Tehreek-e-Labbaik Pakistan (TLP) tekolakba chiokogo, ta iba tamangba yimsü telok indang odongtar kati ashi.

Saad Rizvi ya Brehostibar nikongdang linük anüdoklen Lahore yimti nung chiok, ra TLP odongtar Ejaz Ashrafi-i ashi. Lahore nung aliba mosque ka nung aliba party headquarters nung Rizvi busemer temi pa pelashishia agizükba noksa tem media ajanga sayua liasü.

Lahore telungzük aser temeket nung aliba tongtipang lenmangtem aser highway ka longkak aitertemi anogo ter mokdanga azüdokshiba anentsü atema sorkar aser TLP tsüngta züngzüktepba sülen iba mera ya agia liasü. Rizvi chioktsü asoshi takhangba agüja longkak aitba mapang police tenet takum samaa liasü.

Rizvi ya pa tebu aser TLP tentetsang Khadim Hussain Rizvi asüba anogo, Hokulbarnü chioka liasü. Khadim asüba anogomung ya asemnü amungtsü sentong lir, ta party ajanga ashi.

Nüburtemi kanga junga meteter aser hardline Muslim

scholar Hussain Rizvi yagi TLP ya tamangba yimsü tsütsü tentet ka ama Islam tamangba yimsü mezüngmeshiba anema tenzüka liasü. Parnoki Islam tamangba yimsü mezüngmeshir ajunga tepsettsü ajungshi aser linük nung Ahmadi religious minority anema azüdokshiba nunga sendaktepa liasü.

2020 küm November ita Rizvi asüpila sentong nung nisung meyirijang ter dak tema dena liasü.

2017 küm tentetba sülen iba telok yagi linük tesem ajungalen aiben longkak aita Pakistan marakzüti kumdaktsü aser iba mapang police den raradang nisunga takum lalua liasü.

2020 küm iba telok yagi France Tir Emmanuel Macron-i jembiba nung rangloker longkak aita liasü, koba Pakistan Ato Kilonser Imran Khan densema Muslim nunger aikati Islam yimsü sempaba ta züngshir. TLP yagi French ambassador meindoktsü aser France den shishilempaba ajunga magitsü akhang, saka sorkari manga.

April ita Pakistan sorkari anti-terrorism legislation kübok TLP ya shibangtsütsü apusoa Saad Rizvi ya iba legislation dak sendakba nung administrative totuyuba kübok apu.

Tang tesüsa longkak aitba tatem kati arutsü atema

tezüngzüktep agiba ya yimjak nung memetetdaksü, saka November 7 nü Ato Kilonser Khan'er cabinet-i TLP ya nokdanga aliba telok ta sangdonga aliba meyipa agi aser provincial sorkar kati Rizvi tenüng anti-terrorism watchlist nungi indoktsü atema apuso.

Saka sorkar nung alir ajungaiba iba mera busema menokdaker amai ajitet, kechiaser Information Minister Fawad Chaudhry-ibo TLP ken o nungi sorkar atsüngzüka ogo, ta Brehostibarnü ashi.

"Sorkari mera balala agiba ya tabensa masü ta nisung aikati bilemer, saka shidakbabo sorkar mesüra state-i extremism den raratsü jungjunga renema mali," ta minister-i Islamabad nung jembidang ashi.

Chaudhry-i jembiba nung telangzüba agütsüba mapang, TLP yagi tesempatep prokshir ta jembiba aitsü aser extremism ya bendanger ka kabu nung lir, ta iba telok odongtar Ashrafi-i ashi.

TLP tentetsang Khadim Hussain Rizvi sür küm ka ajungba bilemteta anogo asem Lahore nung Hokulbarnü nungi tenzüka amungtsü aser iba mapang yimti indang police tekolakba aser yangji aliba administration tekolakbai security aser logistic teyari agütsütsü, ta Ashrafi-i ashi.

Kampala, Yimpoksüi/Nov. 19 (Agencies): Takum bendanga agütsür bomb ana pokdaktsüba lendong nung nisung asem tepsetba sülen Uganda police-i temolung melemteti alir nisung pungo kaset aser 21 apu, ta ketdangsurtemi ashi. Iba bomb lendong ya ISIL (SISI) den sendaktepa aliba telok kati tenüng agia liasü.

Linük anüolen tsütsü aliba counterterrorism officer temi Ntoroko nung kiralongrar südi ta temolung melemi bilemba nisung pezü tepset, shirnok DRC leni meyipa oa liasü," ta police odongtar Fred Enanga-i Brehostibarnü osangbener senden ka nung ashi.

Nisung pungobuba, Sheikh Abas Muhamed Kirevu ya linük yimtiba anasa aputsü merangba nungi jena aodang tepset, shiba yangji aliba Islamic lenir ka liasü aser Kampala nung terror cells tanaben saktetdaksüba nung shilem agia liasü, ta Enanga-i ashi.

Allied Democratic Forces (ADF) pur anema mera balala agiba nung shilem ka ama police temi temolung melemi alir nisung 21 apu. ADF ya Democratic Republic of the Congo anüdoklen kanga yakyaka aliba telungpur telok ka lir, shirnok ISIL den sendaktepa lir ta United States-i ashir.

ADF otsü ya bushidangra, parnok ya Uganda nung sorkar anema nokdakba telok ka lir aser DRC anüdoklen civilian meyirijang aika tepsetba parnok dak tai tonglojka lir.

Uganda yimtiba, Kampala

nung Mongulbarnü bomb ana apokba lendong ya minute ishika tetsüngta lir ataloka liasü, kong takum bendanga agütsür bomb pokloksü ana motorbike nung "boda boda" motorcycle taxi driver ama renemer arua parliament anasa pokdaktsü aser tasembuba yagi central police station anasa aliba checkpoint ka nung tenük yoka liasü.

Iba lendong ana nungya nisung asem takum samatsü aser ano dangar 33 yirua liasü.

Taoba ita Kampala nung aliba Kawempe division nung lenmang anasa kanga nungtu restaurant ka anasa bomb ka pokdaktsüba ADF ajanga tenüng agia liasü.

Iba telok yagi mapang talangka nungi yimsü süa arusang Tir Yoweri Museveni anema nokdaka arur, shiba US security tembar lir aser Somalia nung al-Shabab telungpur telok nungi federal sorkar kumzüka ayutsü mechi peacekeeper yokba African lenir mezüngbuba liasü.

Iba lendong atalokba sülen police temi ADF züngsem südi ta temolung melemteti bilemba nisung aoka puogo aser tongtipang tesemtem nung ano lendong tasen agütsütsü tasa yanglur, ta tekumdangtsü shia liasü.

Washington-i March ita ADF ya ISIL den sendakteptsü, shirnoki 2019 küm nungi tenzüka ADF ajanga lendong agütsübatem social media nung tenüng agia liasü, aser parnok ya Islamic State Central Africa Province, mesüra ISCAP indang regional branch ka ama sangdonga liasü.

Austria nung COVID tensa tamajungba akumer, lockdown tenzüksü

Vienna, Yimpoksüi/Nov. 19 (Agencies): Austria nung COVID-19 mozü magi alirtem atema lockdown ka benokba sülen Hombarnü nungi tenzüka linük tesem ajungalen COVID-19 lockdown tenzüksü sangdongogo.

Iba lockdown ya anogo 20 tashi alitsü aser 2022 küm February 1 nungi tenzüka vaccine agitsü atema ozüng ka yanglutsü, ta Chancellor Alexander Schallenberg-i ashi.

Western Europe nung COVID-19 cases sashia akumba aser vaccine agir ajema aliba atema telangzüba agütsüba mapang pai iba o ya ashi.

Cases timba akumba ajanga European linük aikati tenokdangba agütsür.

"Asenoki wave pungobuba maginer," ta Schallenberg-i Austria nung province tuko

indang governor tem den Austria anüolen resort ka nung senden amenba sülen ashi.

Taoba hopta nisung 100,000 rongnung nisung 990.7 dak coronavirus puteta liasü, anungji lockdown benoktsü ya mera tatemtangtiba lir, ta Health Minister Wolfgang Mückstein-i ashi.

Iba mera kübok Austria nungertem kidang nungi mapa inyaktsü ashitsü, tongtipang masüba dokan tem shibangtsü, tanurtem tsüngtong oa angazüktsü nüngdaka alirtem atema school lapoktsü. Iba tenokdangba ya December 12 tashi alitsü, saka anogo ter lir tanaben asadangshitsü.

Slovak Ato Kilonser Eduard Heger-ia Hombarnü nungi tenzüka vaccine magi alirtem atema lockdown ka tenzüksü sangdong aser Czech sorkaria services tabu

aika nung tenokdangba agütsür. Netherlands-i taoba hopta tatemlen partial lockdown benoka lir.

German lenirtemi COVID-19 agi shiranger mozü kidang aika aliba tesemtem nung mozü magi alirtem asoshi tenokdangba agütsütsü molungtepogo, aser iba mera yagi Germany nung aliba state 16 rongnung state 12 nung kongshitsü.

Tang mongpu mapang EU linük nung full lockdown benokba linükbo Austria ya mezüngbuba alitsü.

World Health Organization nung Europe regional director Hans Kluge-i mongpu mapang tiba tashidak tali züintsü akok, ta tekumdangtsü shia lir. Mozü agir ajema aliba den tashidak nungi kumzüktsü meratem salaba aser tali mela menatapa aoba Delta variant ajanga iba tia ajurutsü, ta pai ashi.

Taliban-i province 7 nung passport agütsü tenzüksü

Kabul, Yimpoksüi/November 19 (Agencies): Afghanistan indang Passport Directorate ketdangsurtemi ashiba agi, ketdangsurtemi Balkh, Paktia, Kandahar, Kunduz, Herat, Nangarhar, aser Khost province tem nung Deobarnü nungi tenzüka passport agütsü tenzüksü, ta local media sangdong balala ajanga metetdaksüogo.

Passport applicants tem nem inyakyim balala nung teyari agütsütsü atema Ministry of Interior Affairs-i iba telemtetba agia liasü, ta Passport Directorate tekolakba Alam Gul Haqqani-i ashiba Khaama Press sangdong ka ajanga metetdaksü.

Passports atema jelia online ajanga forms benoker alirtem nem tamasa maangka agütsütsü ta shia Haqqani-i, passport tem ya officially asadanger aliba e-ID mesera taoba mapang agütsür aliba ID tem dak

ajemdaker agütsütsü, ta ashi.

Haqqani-isa, directorate nung passport 9,00,000 lir aser printing asüba company ket nungi passports 6,00,000 lir, ta ashiba den passports million ka tang temenüngdak lir aser ano passports million tesadang ka menüngtsü, ta shimsem.

Taliban-i sorkar atsüngba sülen parnoki tang tashi nung passports meyirejang noklang aika agütsüogo, kong Afghan nunger million 500 shi densema lir, ta Khaama Press sangdong ajangsa metetdaksü.

Afghanistan nung Taliba-i sorkar atsüngtokba sülen nüburtem aika tetsübu tia nung lir aser bendangertem dang masü saka Afghanistan nung aika linük toktsür aotsü atema merangtepba mapang ka lir, kechiyong taoba mapang Taliban-i yimsü asüba mapang nüburtem timtem nung aliba ama tanga kasaji ataloktsü akok ta tsüba bilemer.

Kü Temeim Kinungbo / Oba Nokojungba Ozüküm Menungra-a bilemteter



Onok mulungjang nungi kodanga amatsü makokba kü temeim Kinungbo (Tambo) aser Oba. Nai onok doktsür asen kümtedakbai anileni orr tanü November 20, 2021 nung küm ka abensar, saka tanü tashi onok mulungjang nungi na menungra-a nüktzü ayimer. Oda na pongmangdangbo Tsüngrem ajurur amai bilemer aser temoatsü angur. Na akümlü nung alidang nai onok asoshi mapa tajung aika zeb-zeb ta renemtsür asen alangzüksang dangi ogo nii. Na Kodak nung Yisu den lir ta onok temulungjang anisüngzüka sarasadem amonger nii....

Kechiyong asenok taküm lira, asenok Kibuba atema taküm alir, aser asenok süra, asenok Kibuba meyong.

Rom 14:8

~ Temeim Kinungtsü, Tanurtem aser Semchir.

PELABA LEMSATEPER



ASO:
12-11-1926

ASÜ:
15-11-2021

Onoki teti meima aliba ozü akhümdong arishir Pusutem Longzük, Asür **Temjensuba Tzüwar** (Ungma), mapang tatsüka shiranga alidang aser tasüba anogo (15-11-2021), tashi Arogo, Kija kibong, kidong, lokti balala, kiyonger aser medemertemi nübu, rongsen aser sarasadem agi onok den yaritepa asoshi pelaba lemsateper.

Onoki nenok ajak dangi tsüngdong arua pelaba melemsatepetaka onok takoksa aser mangyim tia nung alidang yariba asoshi kanga pelar ta iba sangdong ajanga lemsateper. Tulusang Tsüngremi nenok maneni moajangma.

~ Chirmur, semchir aser kinungertem

TEPELA TASOBA ANOGO

Tenüng : Sentirena Aier
Tasoba anogo : November 20
Küm : 3
Talidak : United Colony, Dimapur

Happy birthday temeim Renren, na tasoba anogo nungi tanü küm 3 ajungba anogo tashi Tsüngremi na moatsüba atema Tsüngrem tenüng asanger. Tsüngremi na arishi talang moajang aser nü takum teti pela alitsü onok sarasadem.

From - Oja, Oba, Otsü, Obou aser kinungertem.



METETDAKTSÜR

Taküm 2021 Covid-19 pandemic aliba ajanga 13th Marsosang Football Trophy Chuchuyimlang melitetsüsa akümer. Tensa tajungba kümra taruba küm 2022 nung iba asayamung sentong alitsü lemtetba metetdaksür.

Sd/-
Talitemsu
Convenor, MFT

Sd/-
Nungsangtemsu
Secretary, MFT

ALI AYOKER

Tir Yim anasa Seithekima nung, Nonee Resort junction nungi kilometer tesadang ka shi pilar ali takong tayoktsü lir. Ali tasazük Pura 7 (seven) lepzüka ayoktsü akok. (Rate Negotiable).

Contact : 9366045902 / 8787566694

ALI AYOKER

Nuiland matong dang Foothill touch nung Ali tayoktsü lir. 100x100 nung Rs. 300,000/- (Rupees Three Lacs) only. Joko plot ishika dang anünga lir.

First come First.

CONTACT : 7308070002

'Gotham Awards' nung Peter Dinklage nem 'Performer Tribute' agütsütsü

Yimpoksüi/November 19, 2021 (Agencies): Taküm indang Gotham Awards sentong nung Peter Dinklage nem tetushi agütsütsü.

Arishi küm 52 tain aser 'Game of Thrones' star, Peter nem '2021 Gotham Awards' sentong nung 'Performer Tribute' naroküm agütsütsü aser iba sentong ya November 29, 2021 nü New York City nung agitsü.

Gotham Film & Media Institute indang executive producer Jeffrey Sharp-i ashiba agi, "Independent film' nung Peter Dinklage-i alakteta shilem tajung agiogo."

"Feature film tongtibang nung pa maparen takok anguba alimai nguogo aser 'independent artists' atema pai kanga nungitta yariogo," ta Jeffery-i ashi.

2003 küm sayaba movie 'The Station Agent' nung Dinklage-i shilem agiba ngua fans tem atsüa aru aser iba nungi tenzüka project balala nung pai inyakogo.

Nüngtugu HBO fantasy drama 'Game of Thrones' nung

Peter-i Tyrion Lannister shilem agiba ngua alimai pa tali jangjaa aküm. 'Game of Thrones' ya George R. R. Martin-i züluba fantasy novel series 'A Song of Ice and Fire' nung ajemdaker yangluba otsü ka lir.

'Game of Thrones' nung shilem agiba atema, Peter-i Emmy Award pezü den Screen Actors Guild Award ka angu.

Gotham Awards sentong nungsa, arishi küm 31 tain Kristen Stewart den Jane Campion nem kasa - 'Performer Tribute' agütsütsü. Tawa, 'the Power of the Dog' atema lai Director's Tribute angu aser 'Harder They Fall' cast nem Ensemble Tribute agütsütsü.

Iba den bendenloksema Actors Fund, koba performers aser industry nung inyakertem nem teyari agütsür, iba Fund ajanga Impact Salute agizütsü. Alima ajunga asungba Covid-19 mapang timtemer nem teyari agütsüba atema Actors Fund nem iba tetushi award agütsür. Iba Fund ajanga nisung 17,100 nem \$23.9 million agütsüogo.

Phek nung Sanitization & awareness campaign sentong ka agi

Dimapur, Yimpoksüi/November 19 (TYO): Office of the Commissioner for Persons with Disabilities den longjemer Mission Mode Team (Accessible India Campaign)-i ayongzüka state sorkar ketdangürtem atema Right of Persons with disabilities (RPWD) Act, 2016 dak sendakba nung Sanitization & awareness campaign sentong ka ayongzüka agiogo.

Iba sentong ya DC conference hall, Phek nung November 16 nü agia liasü.

Sentong nung Nagaland sorkar Commissioner and Secretary aser Team Leader, Mission Mode Team (AIC), K. Libanthung Lotha, IAS-i sensitization and awareness campaign indang jembia aser

Advocate, Guwahati High Court Kohima Bench, Apila Sangtam-i, Court Directive/ Legal Implications of Non-Compliance onük nung jembia liasü. RPwD Act 2016 overview, benokba jenjang aser tarutsü indang State Commissioner for Persons with Disabilities, Diethono Nakhro-i jembia liasü.

Parnoki, state yimtiba aser district ajak nung public ki tongtibangtem asadanga sülen team-i, rights of people with disabilities dak sendakba nung sanitation and awareness campaign ka ayongzüka agitsü atema sorkar dangi aben, ta ashi. Parnokisa, item nisungtem atema tetsükdaksü kecha makaba talidak ka renemtsütsü aser alima tajungba ka yangertsü atema

nüburtem nem tangazükba agütsütsü nükjidong nung iba sentong ayonga agir, ta ashi.

India ya rights of persons with disabilities dak sendakba nung United Nation Convention nung sign ser aliba linük ka lir, anungii parnok lenla ajak nung tangar den kasa jenjang nung benshitsu atema renemtsütsü nüngdaker, ta parnoki ashi. Tetsükdaksü maliba talidak ka renemtsütsü atema inyakyimtem rongnung osang, tongtepretep aser tanga mapa tem sendaka lir, ta sentong nung o jembirtemisa ashi.

Iba sentong ya Deputy Commissioner, Phek Razouvolie Dozo lenisüba nung agi. Iba sentong nung HoD tem, NGO tem, Arogo tenzükertem, GB tem aser tejangrartem dena liasü.

CVScAH, Jalukie nung outreach sentong ka agi

Dimapur, Yimpoksüi/November 19 (TYO): November 16 nü Outreach Bureau, Kohima-i ayongzüka CVScAH, Jalukie nung 'India's Journey of 100 crore Vaccination' omen nung ajemdaker Integrated Communication and Outreach Programme sentong ka agiogo.

Sentong nung o jembiba mapang College Of Veterinary Sciences And Animal Husbandry (CVScAH) Dean, Prof. Arun Kumar Sangwan-i, Covid-19 wara ajanga India tashi aser terenlok dak tali temulung lemteta kümdaktsüogo. Wara indang tajangzükji linüki tangbo linük tashi dak kanga temulung lema bilemer, ta pai ashi.

Vaccine crore 100 dak tema agütsüba ya takok tulu ta shia

Prof. Sangwan-i, linük nung vaccine agütsüba sentong ya linük atema dang masü saka alima ajunga atema inyakyim khenyongi balaka liasü. Iba vaccine agütsüba sentong yagi asenok tashi angatetsü aser tangar dak memetaloki alitsü atema atema maongka aika agütsüogo, ta pai ashi.

Prof Sangwan-i ashiba agi, wara ajanga entrepreneurs tem nem talisa pharmabiologicals aser vaccination dak sendakba nung parnok dak temulung alemtsü atema tashi agütsüogo. Parnoki tebilemstü kechi südir süaka koktetsü ta sayuogo.

Vaccine agütsüba mapang tetsükdaksü ajurubatem indang jembidang pai, vaccine aika yanglutsüji mapa temela masü asü

aser nüburtem nem vaccine agütsütsü asoshi nübu aser ajia technical nübu aser nüburtemi vaccine agitsü asoshi mulungtetsü kanga nüngdaka liasü, ta ashi. Paisa, inyakyim aika ka kuma longjemer inyakba ajanga vaccine crore 100 dak tema agütsütetogo, ta ashi.

Covid-19 dak sendakba nung olulu osangtem jangjashija shisalen agütsür Dr. Michael Tetseo MO-i, vaccine agiba ajanga timtem dang nungi tajangzük kanga agi timba agütsür, ta ashi. Paisa, Nagaland nung Covid-19 tensa aser India nung agizüker aliba vaccine indang tangazükba agütsü. Iba sentong agiba mapang quiz tetoktepa-a ka ayongzüka agia liasü.

Nahte aser Tsuchoi nati Nagaland Cross Country Championship kokogo



Senior Men category aser Senior Women category nung takok angurtem den AFI Vice President Abu Metha aser AFI Technical Committee, Chairman Stanley Jones külemi tangokba noksa ka yangi angur.

Kohima, Yimpoksüi/November 19, 2021 (TYO): Sangküm January 15, 2022 nung ayongtsü aliba 'South Asian Athletic Federation (SAAF) Cross Country Championship' aser '56buba National Cross Country Race' asayamung atema renemshiba shilem ama, Hokolbarnü Kohima nung Nagaland Cross Country Championship asaya liasü, ta sangdong ajanga metetdaksü.

Iba championship Indira Gandhi Stadium nung asaya, kong Chairman, AFI Technical Committee & President, Telangana Athletic Association, Stanley Jones aser Technical Official, AFI Sambhudas Bandopadhaya matsüngdang Vice president, Athletics Federation of India (AFI), Abu Metha-i Nagaland Cross Country Championship tenzükja (flag off) liasü.

Iba tetoktepba nung

Nagaland kübok district balala nungi athlete 200 dak temai shilem agiogo.

Senior men's 10 km event nung, Nahte N Wangnao-i mezüngbuba jenjang (35:57 minute) nung takok angur. Kasa tetoktepba nung Cuvoto Medeo aser Wede T Mero nati tanabuba aser tasembuba jenjang ajangzüktet.

Senior women's 10 km nung, Tsuchoi T-i mezüngbuba jenjang (43:55 minute) nung takok angur. Iba asaya nung Songmo P aser Peiheteile Esalung nati tanabuba aser tasembuba jenjang nguogo.

Kasa championship kübok tanga category nung takok angurtem vamai alitsü:

- * U20 boys (8km): 1. Taliyanger Ozukum - 32:08 min, 2. Kughato Swu, 3. Lhouvisalie Mere
- * U20 girls (6km): 1. Niansai T - 29:26 min, 2. Vekholhulü, 3. Calista Tungoe

* U18 boys (6km): 1. Muchiu - 23:20 min, 2. Shosu Pohen, 3. Ngonuyi Yhobu

* U18 girls (4km): 1. Vesatsülü Khesoh - 18:33 min, 2. Chimmushe, 3. Nirmala Rai

* U16 boys (2km): 1. Kiutsu - 7:41 min, 2. Yongwan Kakhok, 3. Thejanguzo Pfkukha

* U16 girls (2km): 1. Neikethonuo Janet - 9:23 min, 2. Imtisangla Kangshou, 3. Khrotsho-u Tshuh

Maneni, category shia nung takok angurtem nem senpet agütsüogo. Senior men's aser women's nung takok angur nem senpet 20,000; tanabuba jenjang nung takok angur nem senpet 15,000 aser tasembuba jenjang angur nem senpet 10,000 agütsü. Tanüngba category nung takok angur nem senpet 10,000; tanabuba aser tasembuba jenjang nung takok angur nem senpet 7,000 aser senpet 5,000 agütsüogo, ta kasa sangdong ajanga metetdaksü.

NRYO Annual Sports meet 2021 tenzükogo



Kohima, Yimpoksüi/November 19, 2021 (TYO): Police Ground, New Reserve, Kohima nung Hokolbarnü Police Ground, New Reserve, Kohima indang Annual Sports Meet 2021 cum Lt. Kelhousito Memorial Trophy asayamung tenzükogo. Iba Sports Meet cum Lt. Kelhousito Memorial Trophy ya "For a better Tomorrow" omen nung ajemdaker ayongzüker, ta sangdong ajanga metetdaksü.

Iba asayamung lapokba sentong nung, New Reserve Panchayat indang Chairman, Vikehiekho Kintso-i, Kohima nung Panchayat tentet tasen rongnung New Reserve ya asütsü. Ibayongji, kisüjensü, lenmang aser tanga terenlok

maparen densema lenla aisü nung iba colony yagi tangar memene lir, ta ashi.

Ajisüaka, tarutsü tajungba aser terenlok alitsü asoshi, nüburtem longjemba dak tuluka keta lir aser ajak longjemer inyakba ajanga colony atema tesendaktep tajungba yanglutsü, ta pai ashi.

Tawa tanü lanurtemi nüburtem nungdakba jangjatetsü nungdaker aser saisapong süshia mesüra tanga maparen nung takok ngua tejakleni aotsüla, ta pai shisem.

Kintso-i, saisapong nung tokteptsü mesüra asaya nung takok angutsü tebilemba kisüng nung masü, saka saisapong ka ama asayar ka dak sempet tajung alitsüla aser tangatetba

tajung nung shilem agitsüla, ta ashi.

Kasa sentong nung NRYO, President, Vikuosalie Zashümo-i telok pela agizükba mapang, pai iba asayamung nung shilem agirtem dang pei sasa ajemalutsü, mapang shitak amshitsü aser longjemtsü asoshi ayongzüka liasü.

Annual Sports Meet 2021 cum Lt. Kelhousito Memorial Trophy asayamung nung Sector trok - Tekhuba, Lower MT, Upper MT, Project, IG aser Dairy Farm agi shilem agitsü. Team trok yagi saisapong asem - Football, Basketball aser Volleyball nung tokteptsü. Saisapong asemprongla ya tetsür aser tebur category lemsar asayadar.

Tebur football mezüng semi-final nung, Lower MT aser Upper MT Sector asayatsü. Tanabuba semi final nung Tekhuba aser IG Sector asayatsü renema lir.

Maneni, tetsür basketball mezüng match nung Tekhuba aser Upper MT asayatsü. Tanabuba match nung IG Sector aser Project Sector na asayatsü.

Iba Meet Honibarnü (20.11.2021) tembangtsü, ta kasa sangdong nung shia lir.

Indonesia Masters: Sindhu o Srikanth na semi-final-i iogo

Bali, Yimpoksüi/November 19, 2021 (Agencies): Hokolbarnü, Indonesia Masters Super 750 badminton asayamung quarter final nung, PV Sindhu aser Kidambi Srikanth nati pei pei tata asaya takok anguba sülen, semi-final tongogo.

Iba asayamung tetsür kija quarter final nung, world champion Sindhu-i minute 32 nung 21-13 21-10 agi seed tasembuba Turkey tsür Neslihan Yigit tsükdaksü.

Kasa asaya tebur quarterfinal nung, Srikanth-i külem India nung HS Prannoy 21-7 21-18 madak takok angur.

Srikanth, shibai tan ita tetenzüklen Hylo Open semi-final tongteta asaya, Brehostibarnü Round of 16 nung pai Olympic champion Viktor Axelsen tsükdaksü.

Taoba mapang asaya densema Olympic medal

anaben angur Sindhu-i pezüben (4-0) tashi Neslihan Yigit madak takok angur asütsü.

Taoba ita Denmark Open asayamung nunga Hyderabad nungi arishi küm 26 tain aser world no 7 Sindhu-i Yigit tsükdaksü.

Srikanth-i Thailand nungur Kunlavut Vitidsarn mesüra Denmark nungur Anders Antonsen den semifinal asayatsü.

Sindhu, shibai quarter final tashi rank teküboklen alir asayar den asaya aruogo, lai Japan tsür Akane Yamaguchi den semifinal asayatsü.

Tang, Yamaguchi ya world no. 3 aser top seed asayar ka asüyongjia, asayamung balala nung Sindhu-i Yamaguchi aiben kokdanga (12-7) lir. Iba den külemi taküm tena anaben tashi asayaba mapang Sindhu-i asaya anaprongla kokogo.

AB de Villiers cricket asaya nungi anener

Yimpoksüi/November 19, 2021 (Agencies):

Hokolbarnü, South Africa nungur cricket asayar mongin AB de Villiers-i cricket asaya ajak nungi anenba sangdongogo. Pa dak temulung lemtetba atema taoba mapang South Africa captain Villiers-i RCB captain Virat Kohli aser team ajunga dang pelaba lemsatep. 2018 küm May ita De Villiers-i international cricket nungi anenba sangoktsü.

Sangdong ka nung De Villiers-i, "Jangratema asaya aruogo, saka cricket dak sendakba asaya ajak nungi anentsü telemtetba agiogo," ta ashi.

Kishilen (backyard) keti (brothers) nungur den cricket asaya aruba mapang nungi, tejangraba tulu nung aser pelashishia ni cricket asayaogo. Tang ni arishi küm 37 jungogo aser taoba ama jangrabangra asayatsü makoker, ta pai ashi.

Kibong nungtsürabur, adianu (brothers), kinungtsü Danielle aser chirnurtemi bendanga agüja nungitta yariba yong tanü ni iba jenjang tashi tongteta asayaogo. Külem team pur, asaya nung tetokteper, coach, physio aser staff züngsem ajak dang pelaba lemsateper; aser South Africa, India den tesem balala nung asaya arudang, kwinakati shisatsü agi nungitta yariogo nenok ajak dang pelaba shisemer, ta De Villiers-i ashi.

Meimlai ka cricket wadang agizüka junga asayaogo. Titans mesüra Proteas mesüra RCB mesüra alima ajunga nung asaya aruba mapang bilema maliba jenti ajangshio aser

maongka tajung aika nguogo; aser iba atema teti pela alitsü," ta De Villiers-i ashi.

De Villiers-i cricket asaya ajak nungi anenba sangdonger asünung, IPL franchise Royal Challengers Bangalore (RCB) nunga pai masayatsü. IPL season 10 tashi nung Villiers asayaogo.

AB de Villiers-i, "RCB atema mapang talangka asaya aruba lenmang aisü nung tajangzüker nguogo. Küm 11 shi memetetti dang süitemogo aser külem team pur toktsütsü temulung agi menanzüker. Atangji nunga, telemtetba agitsü asoshi mapang talangka agi, saka junga bilemdanger sülen iba asaya nungi anentsü aser kibong nem mapang peria agütsütsü asoshi lemtet. Tesüiba küm aika nungi kü dak tamang kateta aser nungitta aruba atema, RCB management, kü tembar Virat Kohli, külem team pur, coach, support staff, fans aser RCB nung amalitepa inyaker ajunga dang pelaba metetdaksür."

"Kodanga mamatetsüsa RCB den jangratema asaya aruogo. Taküm piyong pela alitsüsa tajung aika ajangshio. Ni aser ozü kibongi teti RCB den tesendaktep tajung ayutsü aser iba team tajung maneni nungittsü. RCB fan ka ama teti iba team bilemtetsü," ta De Villiers-i shisem.

RCB atema AB de Villiers-i match 156 asayaogo aser iba mapang pai run 4,491 shi yangluogo. Iba team nung run timba yanglur rongnung Virat Kohli sülen De Villiers asütsü.

BILEMDANGANG

"Tangar dang noklang aiben ashiba dang nungi nai ka inyakbaji taoba."